

PABOJA ETEHUE'YO CONOSA CUIÑAJJI YASIJJE COLOSENSES

Pabohua Shomajo ejeanobia aniya esohui tehue canaje Jesosaja epeeji cuana Conosa cuiñajjijo ba'e yasijje

¹ Eya Pabo, Jesosa Quitoja huoojea'yo ojaya esohui huohuiya. Jamaya Eyacuiñajji sa poanaje.

² Timoteohua esejaya epeeji enijje esohui tehue cani miquiana huasijje jama ba'a: Ma Eyacuiñajjija epeeji cuana huasijjeme Conosa cuiñajjijo ba'e, ecuanaja epeeji e'e jojo nei Jesosa Quito nijje jjapee neineiquiani yasijje.

¡Esejaya Chii aiya, Eyacuiñajjiya miquianaya ca-jaahuana cahua quea pame nee, quea bei capo mee cahua pea'ai!

Pabohua Eyacuiñajji bihuia cani

³ Eyacuiñajji, esejaya Emeshi Mese nei Jesosa Quitoja Chii eyaya bihuia tiitiaña onijje miquianajo mimianijo.

⁴ E'e, pea cuaa eya huohui cani jama ba'a: —Jesosaja epeeji cuaa Conosajo ba'ecaa Jesosa Quito shajja'ajja cani tii. Ojjaña Eyacuiñajjija epeeji cuana quea jea nee acani pea'ai.

⁵ E'e, miqúanaya esohui e'e jojo nei Jesosa Quitoja yahuajo pishana shajja'ajja coo majje oni-
jje jjapeequinaje. Jjashahuabaquiiani eba'e ti-
itii'yojji quea pame nee eyajo onijje pea'ai. E'e jojo
nei Eyacuiñajjiya jamaya acaje'yo miqúanajo.

⁶ Jiquio esohui e'e jojo nei Jesosa Quitojo ojjaña
meshi yasijje huohui cani. Jamajjeya quea huiso
dejja ba'e mee cani quea pame nee, miqúan
jayojjaya. Jamaya miqúanaya esohui shajja'ajja
coo majje jjabahuejjaqui'yonaje. Jamajjeya
jjabahuejja neinei'qui'yonaje ba'a: Eyacuiñajjiya
dejja cuana jaahuana cani e'e jojo nei.

⁷ Dejja Epapasi bajjani ecuanajaya quea jea nee.
Ohuaya Jesosa Quitoja esohui huohui ca'yonaje
miqúan que. Oya ecuaña jayojjaya Jesosa
Quitoja yajji chacochoani. Ecuaña sohuihuo-
hui sahuajji quea pame nee pea'ai.

⁸ Ohuaya ecuaña huohui canaje jama ba'a:
—Edojjoshahua Pameya Jesusaja epeejji cuana
Conosajo ba'e pea epeejji cuana quea jea nee po
mee cani —Epapasi poanaje.

Pabo miminaje Eyacuiñajji nijje

⁹ Epapasija esohui quea pame nee miqúanajo
shajja'ajja'yo majje ecuaña Eyacuiñajji nijje
mimi huicha'a huicha'ani jama ba'a: —
Eyacuiñajji, ¡ecuanajaya epeejji cuana ba neinei
meesahuacue ache echacojji shai mijo onajaya
poaje! Edojjoshahua Pameya oya cuana miquea
esohui caba meesahua cahua quea pame nee,
cjjashahuabaqui meesahua cahua quea ja'a nee
epojji pea'ai.

¹⁰ Jamajjeya ¡oya cuana Jesosa Quitoja esohui jayojja jama ba'e tiitii mee'yocue! Jamaya poanijo Jesosa Quito quea bihui nee nee poaje onajo. ¡Quea pame nee nee chaco tiitii meecue Jesosa Quitojo pea'ai! E'e Eyacuiñajji, ¡miquea epeeji mijo jjabahuejja tiitii meequicue pea'ai!

¹¹ Miya ca ca oe quea ca'a nee nee, Eyacuiñajji. Jamajjeya ¡miquea epeeji cuana Conosajo ba'e jjapeequi meesahuacue quea ca'a nee nee! Jama-jjeya oya cuana miquea esohui pajea'yo ajja tii tii dejja quea mase cuaa napa cajje, yeno'ama poaje.

¹² Eyacuiñajji, ecue Chii ai, oya cuana quea boe-jea'yo po mee'yonaje miyaya. Jamajjeya quijje oya cuana miquea pea epeeji cuana nijje ba'e tiitii meeje'yo quea ja'a nee minijje eyajo. E'e Eyacuiñajji, jamajjeya apoa.

¹³ Yahuajo eseya Edosiquiaa napa ca'yonaje. Quea mase nee, quea mimishi nee nee. Jjeya ca ca esejaya Chii aiya eseya jjeshe ca'yonaje. Jama-jjeya oja Bacua oe nei esejaya Emeshi Mese nei quea ca'a poaje'yo tii. Oja Bacua Jesosa Quito Eyacuiñajjija quea jea nee nee poani tii tii.

¹⁴ Jama ba'a: Jesosa Quitohua esejaya mimishi cuana cuijea'yo majje Edosiquiana quea ca'a nee eseya mesena pajea mee ca'yonaje.

Jesosa Quito esejo mano'yonaje

¹⁵ Dejja cuanaja Eyacuiñajji ecojja bajji poj-jeama, jjacojjaba meequi ajja. Jamatii oja Bacua Jesosa Quito Eyacuiñajji jayojja nei neiya, o jayoj-jaya jama poani pea'ai. Jamajjeya Jesosa Quito ba majje Eyacuiñajji esejaya eba. Oya, Jesosa Quito

ojjaña e'aquiana mese. Ojjaña aquiana cuana oja pana poa.

¹⁶ E'e, Eyacuiñajjiya Jesosa Quito nijjeya ojjaña aquiana cuana pana ca'ya poa, jiquio aquiana ba'a: Ojjaña aquiana ojjaña meshi cuanajo pana ca'ya poa; ojjaña aquiana eyajo pana ca'ya poa pea'ai. Aquiana cuana ecojjaja ebajji, pea aquiana ecojjaja ebajji pojjeama pea'ai pana ca'ya poa jiquio ba'a: Eyacuiñajjiya esohuidojojji quea ca'a nee pana ca'ya poa, eshahua cuana quea huiso, quea mimishi po jjimahuajo, pana ca'ya poa pea'ai. E'e, Eyacuiñajjiya Jesosa Quito nijjeya ojjaña aquiana, ojjaña tii pana ca'ya poa Jesosa Quitoja ya'yojji.

¹⁷ E'e, oya Jesosa Quito ba'e tiitiiya poa ojjaña aquiana pana jjimahuajo. Ojjaña aquiana nequi tiitii mee cani quea pame nee, Jesosa Quitohua.

¹⁸ Ojjaña ojaya epeeji cuanaja mese poani tii tii pea'ai. Ohuaya ma epeeji ojaya huapa pojjeama jayojja jama ojee jjapeequi meesahua cani, ojjaña. O jayojja ba'e meesahua cani. Mano'yo majje Jesosa Quito ebionei shequi o'oyanaje. Jamajjeya oya oe nei quea ca'a nee nee poani tii tii.

¹⁹ E'e, oja Bacua Jesosa Quito o jayojja poani tii tiijo, Eyacuiñajji quea bihui nee nee poani.

²⁰ Yahujajo dejja cuana quea mimishijo Eyacuiñajjiya ojjaña aquiana cajaa aca'ya poa. Jesosa Quito acui ecueata'apeejo ba'e na cuayaqui'yonaje. Mano'yonaje. Jamajjeya Eyacuiñajjiya mimishi cuana cuijea caje'yo. Jamajjeya quea bei po o'oyanaje ojjaña oja pana cuana nijje eyajo, meshi cuanajo anica cuana nijje pea'ai.

21 E'e, miquianaya yahuajo quea mimishi poanijo, quea jashahuabaqui tai poanijo pea'ai Eyacuiñajji nijje jjapeequi ajja. Quea huesha nee poquiquehuani jayojja poanaje.

22 Jesosa dejja jayojja yamijji nequinaje. Jamajjeya Jesosa Quito esejaya mimishi cuanajo mano'yonajejo, Eyacuiñajjiya eseya ojaya epeeji cuana po mee ca'yonaje. Jamajjeya Jesosa Quitohua eseya Eyacuiñajji yasijje poqui mee caje'yo mimishi'ama, quea bojea epo'yo pea'ai. Jamajjeya Eyacuiñajji ese nijje quea bei poaje eyajo, ca ojaya esohui jama ba'e tiitiinajejo, Jesosa Quitoja esohuijo jashahuaba tiitiinajejo pea'ai.

23 Jiquio esohui shajja'ajja majje ja'a pajea'yojji pea'ai! Quea huiso dejjaa quea huiso meshijo ba'eya jiquio esohui shajja'ajja cani eseyaya jayojjaya.

Jesosa Quitohua ca oe Pabo huojea canaje esohui huohuiya

Jesosa Quitoja esohui ojjaña dejjaa shajja'ajja canaje ojjaña meshijo. Eya ca ca iña e'e jojo nei Eyacuiñajjiya esohui huohuijji; Jesosa Quitoja esohui huohuiña.

24 Jesosa Quitoja esohui eya huohuiyajo, pea cuaa eya jeyo majje jeanobiajea canaje quea huiso cahuijo; quea nee. Jamatii eya quea bhui nee poani. Yahuajo Jesosa Quito quea nee nee poa. Jjeya eya quea nee pishana poani miquiana Jesosaja esohui jayojja ba'e meesahuajji. E'e pojja'a quijje Jesosa jayojja eya quea nee nee poaje. Dejja cuaa eya napa cajje eya quea ca'a poajo, Jesosaja epeeji cuana quea ca'a poaje pea'ai.

25 E'e jojo nei Eyacuiñajjiya eya huoojea ca'yonaje ojaya esohui huohuiya ojaya epeeji cuana huasijje. Jamaya miquiyanaya jjapeequi meesahuaña Jesosa Quito nijje. Ojjaña Jesusaja esohui huohuiaña pea'ai. Jiquio esohui eseya Eyacuiñajjiya ba meesahua cani.

26 Jiquio esohui dejja cuanaja quea quehua yahuajo nei poa. Ba mee jjima poa. Jjeya ca ca Eyacuiñajjiya ojaya epeeji nei cuana Jesosa Quitoja esohui ba meesahua cani quea ja'a nee.

27 Jamajjeya jjeya Eyacuiñajjiya ojjaña ojaya epeeji cuana, Jodio pojjeama cuana pea'ai ba mee sa acani ojaya esohui Jesosa Quitojo. Ma esohui quea pame nee nee jama ba'a: Jesosa Quito esejaya eyami dojjojo nequi tiitiiyani. Jamajjeya eseya jjashahuabaquiani onijje eyajo enequi tiiti'yojji.

28 Ojjaña Jesosa Quitoja esohui ecuaaya huohuiaña quea ja'a nee ojjaña huasijje. Ojjaña nei nei jjabahuejjaqui meeaña ojjaña Jesosa Quitoja epeeji quea ca'a nee epoiji. E'e, jamaya poaje Jesosa Quito poe o'oyajo.

29 Miquiyanaya Quitoja epeeji quea ca'a nee epoiji eyaya janobajjima nei esohui huohuiaña Jesosa Quitoja. Jesosa Quito ecuea eyami dojjojo quea ca'a nee nequi. Ohuaya eya esohui ba neinei meesahua cani miquiyana huasijje ehuohuijji.

2

1 ¡Bacue jiquio! Eya janobajjima nei jjashahuabaqui majje Eyacuiñajji nijje mimi neineiiani miquiyanajo Conosajo ba'e yasijje. Mimi neineiiani Jesosa Quitoja epeeji cuana Naonisea

cuiñajjijo ba'e yasijje pea'ai, Jesosa Quitoja epeeji cuana ecuea ba jjima cuana huasijje pea'ai. Jamatii eya jjashahuabaquiani onajo pea'ai.

² Jamajjeya eyaya ojjaña miquianaya Jesosa Quitoja epeeji cuana quea ca'a nee po meesahuaje'yo. Miquianaya pea cuana nijje jjapeequi meesahuaje'yo e'e jojo nei pea'ai, esohui quea pame nee Jesosa Quitojo jjabahuejjaqui meesahuaje. Quea bei nee jjashajja'ajjaquije. E'e, jjeya ojjaña cuana esohui Jesosa Quitoja Eyacuiñajjiya ba meesahua caje'yo quea ja'a nee. Yahuajo ca maya ba mee jjima poa.

³ Jesosa Quitoja eba ojaye nei Eyacuiñajjija ej-jashahuabaquijji, ojjaña tii. Onijje jjapeequianijo, Eyacuiñajjija ejjashahuabaqui'yojji quea ja'a nee ba meesahua cani Jesosa Quitoqua.

⁴ ¡Ecuea esohui etehue'yo ba neineicue miquiaaya! Pea dejja cuana siajje poani Eyacuiñajjijo ja'a shajja'ajjajji! Dasia ca chana' mi.

⁵ E'e, eya ejeanobia ani. Jamajjeya miquiana nijje eya enequijji pojjeama. Jamatii eya jjashahuaba tiitiiquiani miquianajo, miquiana nijje nequi jayojjaya. Ecuea eba miquianaya Jesosa Quito nijje jjapee neineiquiani quea pame nee, ojaya esohui jayojja jama poani pea'ai. Jamajjeya eya quea bihui nee nee poani miquianajo.

Jesosaa eseya o jayojja ba'e meesahua caje'yo

⁶ Jamajjeya miquianaya Jesosa Quito nijje ebionei jjapeequi'yonajejo oya miquea Emeshi

Mese nei quea pame nee poanaje. Jamajjeya ¡ba'ecue ojaya epeeji nei!

⁷ Jamajjeya ¡Jesosa Quitoja epeeji quea ca'a nee oe pocue! ¡Ojaya esohui ba tiitiicue! ¡Ojaya esohui e'e jojo neiyo jjashahuaba tiitiiquicue pea'ai! E'e, jamaya pea dejjaa miqúanaya huohui canaje. Eyacuiñajji nijje jamaya mimi tiitiicue: —E'e Eyacuiñajji, jamaya miquea esohui quea pame nee.

⁸ Dejja cuaa esohui e'e nei pojjeama huohui cani miqúanaya. Quea quehua nee, etiiquiana cuanaja esohui. Jesosa Quitoja esohui jayojja jama pojjeama, quea ja'a nee pojjeama. ¡A'a shajja'ajjajji! Dasia caje'yo cuaa mi.

⁹ Jamajjeya ¡bacue jiquio! Oya Jesosa Quito eseya jayojja yamijji poa. Jamatii oya Eyacuiñajji nei poa.

¹⁰ Jesosa Quito nijje jjapeequianijo, Eyacuiñajjiya eseya ba'e tiitii mee caje'yo Jesosa Quito jayojja epo'yojji. E'e, Jesosa Quito Emeshi Mese nei oe nei quea ca'a nee nee. Ojjaña eshahua cuanaja mese, Eyacuiñajjiya esohuidojojji cuanaja mese pea'ai quea ca'a pishana, de.

¹¹ Ojaya etiiquianaja esohui jama Jodio dejja cuaa cuiishasha jehuissejjajea cani. Jamaya huohui jjima acani Jesosa Quitohua. Onijje jjapeequianijo, ohuaya miqúanajaya mimishi pajea mee ca'yani, miqúanajaya ejjashahuabaqui'yojji quea mimishi chama'yo po mee ca'yani.

¹² Jesosa Quito mano'yajo dejja cuaa ohuajea ca poa. Eyacuiñajjiya oya shequi mee ca o'oyanaje. Jesosa Quito ohuajea ca poa jayojja jamaya peaa miqúanaya enajo besa mee canaje Eyacuiñajjiyo.

Jamajjeya Eyacuiñajjiya Jesosa Quito shequi mee ca o'oyanaje jayojja jamaya ohuaya miquianaya ba'e meesahua caje'yo Jesosa Quito jama epo'yojji, ojaya esohuijo jjashajja'ajjaquianijo.

¹³ Yahujajo Jodio pojjeamaja Eyacuiñajjiya esohui miquianajaya ba jjima. Quea mimishi nee nee poanijo miquea edojjoshahua cuaqui yasijje do-biqui'yo quiaye poanaje. Jjeya ca ca Eyacuiñajjiya miquianaya ba'e tiitii mee caje'yo Jesosa Quito nijje mimishi cuana ojjaña tii cuijea ca'yonajejo.

¹⁴ Esey aje oe Moisesija esohui etehuejo jjashajja'ajjaqui ajjajo, Eyacuiñajjiya tehue mee canaje jama ba'a: “Ojjaña quea mimishi nee nee” poanaje. Jamatii jojoya Jesosa Quito esejaya mimishijo mano'yonaje acui ecueata'apeejo. Jamajjeya Eyacuiñajjiya e'e jojo nei esejaya mimishi cuana cuijea neinei ca'yonaje.

¹⁵ E'e, Jesosa Quito acui ecueata'apeejo mano'yonaje. Jamajjeya eshahua cuana ca'a'ama po mee ca'ya poa, Eyacuiñajjiya. Jamaya ojjaña eshahua mese cuana jeabichajjea ca'ya poa. Eyacuiñajjiya ojjaña ba mee canaje eyajo anica.

¡A'a esohui e'e nei pojjeama shajja'ajjajji!

¹⁶ Jamajjeya ¡bacue oe! Pea cuaa miquianaya tecuea cani ojjaña bobi miquiaa ijjañaño, pea e'ishijji ishiañaño pea'ai. ¡A'a oya cuana shajja'ajjajji! Jodio cuanaja esohui jama ba'a: Ojee e'ijjañajji pojajjo, epojja chacocho meee ajja pea'aijo huohui cani; ¡a'a oya cuana shajja'ajjajji!

¹⁷ Yahujajo ma esohui cuanajo dejja cuana jjashahuaba meequi ca'yonaje ma Jesosa Quito-hua quijje poe majje acañaje. ¡Jjeya nei Jesosa

Quitoto jashahuabaquicue! Oya ca ca oe nei quea pame nee.

¹⁸ Pea dejja cuaa jjacahuibaqui majje miqúanaya Eyacuiñajji esohuidojojji bihuía mee sa acani bobima' ani tii. Ma dejja cuana ojaya ejjashahuabaquijji quea taijo mimi huicha'a huicha'ani. Jama siájje pome poani ba'a: —Ecuea ejjashahuabaquijji quea ja'a nee; onajaya quea ja'a pojjeama —poani.

Tecuea canijo ca oe ja'a jashajja'ajjaquijji! Eyacuiñajji nijje mi poqui pajea mee ca chana'.

¹⁹ Ma dejja cuana aje oe Jesosa Quito nijje, esejaya Emeshi Mese nei nijje jjapeequi pajea'yonaje. Eseyaya Emeshi Mese neiya Jesosa Quitohua ojjaña ojaya epeeji cuana jjabahuejjaqui mee cani ojee. Jama ba'a: Jesosa Quito ojjaña ojaya epeeji cuana nijje ese ejja jayojja poani. Ojjaña ojaya epeeji cuana Jesosa Quitoto eyami jayojja poani. Esapa jayojja esejaya Emeshi Mese nei Jesosa Quito poani. Jiquio ecua esapaa eyami poqui mee cani jayojja jama Jesosa Quitohua ojjaña ojaya epeeji cuana huoojea cani, jjabahuejja meequi cani ojee ejjapeequijji. Jamaya Eyacuiñajji quea boti nee. Jamaya Eyacuiñajjiya ojjaña ojaya epeeji quea ca'a nee po mee sa acani. Eseyaya Emeshi Mese neiya Jesosa Quitohua ojjaña ojaya epeeji cuana ojee onijje jjabahuejja meequi cani; jamaya Eyacuiñajjiya ojjaña ojaya epeeji cuana quea ca'a nee po mee cani. Jamajjeya ojjaña ojee jjapeequi mee cani Jesosa nijje.

²⁰ Miquíanaya Jesosa Quito jayojja jama poanijo Jesosa Quitoto epeeji pojjeama cuanaja esohui quea quehua ja'a shajja'ajjaji! ¿Apiojji acuae jjeya

maya esohui quea quehua shajja'ajja sa poani? Jesosa Quito nijje jjapeequianijo eshahuaja epeeji pojjeama poani.

²¹ Esohui quea quehua jiquio jama ba'a: —Jiquio aquiana ¡a'a napajji! ¡A'a pea bobi cuana ijji! ¡Pea e'ishijji a'a ishijji! —jamaya dejja cuaa huohui nisho cani.

²² Jama pojjeama ca ca Eyacuiñajjiya esohui. Bobi cuana ijjiayeyo majje chama'yo tii poani. Joya miquiaa napaña aquiana chama'yo tii poaje pea'ai.

²³ E'e, jiquio dejja cuaa pea cuana dasia cani; ojaya esohui quea quehua quea ja'a poso acani cuaa. Jamajjeya pea cuana jjashahuaba quehuaqui majje oe pojji bobi ijji jjima acani. Pea'ai Jesosaja esohui jama ba'e sa po'yo ajja. Cho, quea ja'a pojjeama ba'yani. Jamaya poanijo dejja cuana quea mimishi jjashahuabaqui pajea ajja.

3

Yahuajo quea tai ba'ya poa eba'eji Jesosa Quito nijje quea pame

¹ Eyacuiñajjiya Jesosa Quito ba'e mee ca o'oyanaje. Jamajjeya ohuaya miqianaya ba'e mee caje'yo Jesosa Quito jayojja. Jamajjeya ijshahuaba tiitiquicue Jesosa Quitojo eyajo eba'eji! Jama ba'a: Eyacuiñajjiya Jesosa Quito ojjaña huoojea'yojji quea ca'a nee nee po mee ca'yonaje. Oya Eyacuiñajjiya ebianeijji ani.

² E'e, ijshahuaba tiitiquicue oe Jesosa Quitojo! ¡Aquiana taijo oe a'a jjashahuabaquijji!

³ Jama ba'a: Dejjá emano'yojaa mimishi po'yo ajja. Jamaya miquianaya jjeja emano'yo jayoj-jaya mimishi po sa po'yo ajja. Jesosa Quito Eyacuiñajji nijje nequi tiitiiani. Ohuaya miquianaya jaahuana cani quea pame nee.

⁴ Jesosa Quito poe o'oyajo, eseya onijje nequi tiitiije'yo quea ja'a nee nee; o jayojjaya poaje'yo onijje jjapee tiitiiquianijo. Jamajjeya oe ijashahuaba tiitiiquicue Jesosa Quitojo!

⁵ E'e, Jesosa Quito nijje jjapeequi majje jamaya ebionei acue ba'a: ¡Ojjaña mimishi cuana oe pajea neinei'yocue! ¡A'a pea cojjojji pojji! ¡A'a jama jjashahuabaquimeya pojji! ¡A'a quea tai jjashahuabaquijji! ¡A'a quea mimishi ba'e sa pojji! Onajaya aquiana ja'a quea jea bajji pea'ai! Quea dejjá tai poanijo aje oe miquianaya eyacuiñajji nisho bihuiajji jayojja poani, de.

⁶ Jiquio mimishi cuana jama atiitii canijo, Eyacuiñajjiya shajjama' cuana quea nee nee po mee caje'yo.

⁷ Jamaya aje oe miquiaaya yahuajo mimishi ahuicha'a huicha'a'yonaje pea'ai onaaya acani jayojjaya.

⁸ ¡Jjeja ca ca pajea neinei'yocue ojjaña mimishi cuana! Jamajjeya ja'a quea tecue nee nee pojji! ¡A'a quea quene nee nee pojji! ¡A'a quea mase nee nee pojji! ¡A'a pea nijje mimijajijji! ¡A'a quea tai mimijji!

⁹ E'e, miquianajaya eba'ejji quea mimishi yahuajo jama apajea'yonajejo ja'a siajje pojji!

¹⁰ Jjeja miquianajaya eba'ejji quea pame nee po'yonaje. Eyacuiñajjiya miquianaya ba'e meesahua cani quea boejea, o jayojja epojji, o

ba neineiiji epojji. Jamajjeya ja'a quea mimishi po'yojji!

¹¹ Jamajjeya Jesosa Quito nijje jjapeequianijo ojjaña ojaya epeeji cuana cajjapeequiahua pea nijje; pea jayojja oe capoahua. Jodio cuana ca ca Jodio pojjeama jayojjaya ca'a'ama; dejja ecui-shasha jehuisseja'yo ca ca cuiishasha jehuisseja jjima jayojja pea'ai, Jieno dejja pojjeama cuana, Sitinia dejja cuana pea'ai; echacojji sosema' ca ca dejja echacomeejjima' jayojja, ca'a'ama ojjaña. Jesosa Quito ca ca oe nei quea ca'a nee nee nequi tii tii.

¹² E'e, Eyacuiñajjiya miquianaya babaca ca'ya poa ma ojaya epeejjime epojji. Ohuaya miquianaya quea jea nee nee acanaje pea'ai, Eyacuiñajjiya. Jamajjeya quea pame ba'ecue jiquio jama ba'a: ¡Aema' cuana ba'e meesahuacue! ¡Pea cuana nijje jjapeequicue! ¡Mase'ama oe pocue! ¡Quea bei oe pocue! ¡Tecue'ama pea'ai oe pocue!

¹³ ¡Ona nijje tecue'ama pocue! E'e pojja'a pea cuaa miquianaya quea mimishi acaje. ¡Jamatii ojaya mimishi pajea'yocue; ohuaya miquea mimishi capajea ca'yahua pea'ai! E'e, Jesosa Quitohua miquianajaya mimishi cuana cuijea ca'yonaje; jamajjeya ¡miquianaaya oe pea cuanaja mimishi pajea'yocue!

¹⁴ E'e jojo nei ¡pea cuana quea jea nee acue! Jamaya poanijo miquianaya ojee quea ja'a nee nee ba'eje.

¹⁵ ¡Miquianaya oe quea bei nee nee ba'ecue Jesosa Quitohua miquianaya quea bei nee ba'e meesahua canijo! Miquianaya ca ca oe Jesosa Quitoja epeeji poani. Jamajjoya eseya jjapee-

qui mee caje'yo quea cojja bei epojji. Majoya miquianaya iyaa ca'yonaje Eyacuiñajjiya. ¡Eyacuiñajji bihuiacue pea'ai!

¹⁶ ¡Ojjaña Jesosa Quitoja esohui cuana shajja'ajja tiitiicue! ¡Quea ja'a nee esohui esejaya epeeji cuana huasijje huohuicue; shajja'ajjacue pea'ai! ¡Ojee jjabahuejjaqui meecue quea ja'a nee pea'ai! Eyacuiñajji bihuiañajo jama pocue ba'a: ¡Sohuicuayacue quea bihui nee Jesosa Quitojo! ¡Miquianaaya Eyacuiñajji bihuiacue sohuicuayaniya pea'ai! ¡Quea quiijji bei nee pea'ai pocue Eyacuiñajji! E'e, ¡o jayojjaya jama ba'ecue!

¹⁷ Esejaya Emeshi Mese nei Jesosa. Ojaya epeeji poanijo ¡ojjaña miquea esohui ojaya yajji acue! ¡Ojjaña miquea echaco ojaya epojji chacocue pea'ai! Jesosa Quitoja miquianaya jamaya ameesahua canijo, ¡Eyacuiñajji, esejaya Chii ai oe bihuiacue!

Eyacuiñajji esejaya eyamijo quea pame nequi

¹⁸ Jamajjeya ehuanase cuaaya, Jesusaja epeejiya, ¡yahue shajja'ajjacue! Jamaya miquianaya quea pame nee poaje.

¹⁹ Yahueya, ¡miquea ehuanase quea jea nee acue! ¡A'a oe onijje quea tecue nee pojji!

²⁰ Esho'i cuaa, Jesusaja epeeji poaniya, ¡shajja'ajja tiitiicue mique chii, miquea enaese pea'ai! Jamaya miquianaya poanijo, Jesosa Quito quea bihui nee poaje.

²¹ Echii cuaa, enaeseya pea'ai, ¡a'a jamatii tecuea huicha'ajji mique bacua cuana! Oya cuana quea yeno nee poaje miquiaa tecuea tiitii'yajje.

¡Echacojji cuana, echacomeejji cuana pea'ai quea pame oe pocue!

²² Miquianaaya echacomeejjijo chacochoacoani ojaya yajjijo ¡miquianaja echacomeejjija esohui jama chacomeya oe acue, ojjaña tii! ¡O ba majje a'a chaco nishojji! Cho. ¡E'e jojo nei quea bihui nee oe chacocue ojaya! ¡Jamaya oe acue miquianaaya! ¡Jesosa Quito oe quea jea nee ejja'aqui!

²³ Miquianaaya echacomeejjijo chacoñaajo Eyacuiñajjijo chacoña pea'ai. Jamajjeya ¡chaco neineicue Eyacuiñajjijo quea bihui nee epojji!

²⁴ E'e, miquianajaya eba jama ba'a: Quijje eyajo esejaya Emeshi Mese neiya miquea echaco quea pame nee cuana sosequia caje'yo, ma ecua ohuaya huohui ca poa jayojjaya acaje'yo. E'e, miquianaya chacochoacoani Jesosa Quitojo, esejaya Emeshi Mese nejjo.

²⁵ ¡Bacue oe! Eyacuiñajjiya ojjaña shajjama' cuana napa caje'yo quea mimishi poani sosejje. Ohuaya ojjañaja mimishi ba cani. Jamajjeya joya quea mimishi nee nee poani janobajjima nei napa caje'yo; joya quea mimishi pishana poani oe pojji napa caje'yo.

4

¹ Ojjaña echacomeejji cuaa, ¡shajja'ajjacue mo oe! Miquea echacojji cuana miquea yajjijo chacochoacoani ¡sosequiacue oya huiso tii! ¡Oya cuana oe jaahuanacue quea pame nee epojji! ¡A'a pajea'yoyji miquea Emeshi Mese neiya eyajo aniya miya ba tiitii cani!

Pea cuana Pabohua niñeshe'a cani

² Epeeji cuana, ¡mimi majamajacue Eyacuiñajji nijje ojjaña pojajajo! ¡Huea'ama mimicue! ¡Oya oe bihuiacue onijje mimianijo!

³ ¡Eyacuiñajji nijje oe ojee mimicue ecuanajoya pea'ai! Jamajjeya ohuaya ecuana huohui meesahua tiitii caje'yo esohui pame nee Jesosa Quitoja, ma onajaya yahuaajo ba jjima. Ma esohui eya huohuiajoya, dejja mimishi cuaa eya iña majje jeanobiajea ca'yonaje.

⁴ Jamatii miqúanaya ejo Eyacuiñajji nijje mimianijo, ohuaya eya Jesosa Quitoja esohui huohui meesahua caje'yo quea ja'a nee.

⁵ Jesosa Quitoja epeeji pojjeama cuana nijje mimianijo ¡jjashahuaba neineiquicue quea ja'a nee! ¡Quea pame nee oe ona nijje po tiitiicue pea'ai!

⁶ ¡Quea bei, quea ja'a nee pea'ai mimicue Jesosa Quitoja epeeji pojjeama cuana nijje! ¡jjashahuaba neineiquicue onijje mimi jjimahuajo! Jamajjeya onaya Jesosa Quito ba meesahuaje'yo.

Pabohua quea bihui nee esohui tehue canaje pea cuana huasijje

⁷ Dejja Tiquico bajjani Jesusaja epeeji, e jayojjaya Jesusajo chacochoani, ecuanajaya quea jea nee nee. Ohuaya eya chacosahua ca'yonaje Jesosa Quitojo quea pame nee pea'ai. Ohuaya miqúanaya huohui cañaquije jiquiojo e ba'yanijo.

⁸ Eyaya oya huoojeaje miqúanaya huasijje e huohuiya. Ojaya esohui ecuanajo shajja'ajja majje ¡quea bihui nee pocue!

⁹ Tiquico nijje Onesimo poquije. Oya ecuana jayojjaya Jesusaja epeeji quea pame nee pea'ai. Yahuaajo oya miqúanajaya cuiñajjijo ba'ya poa.

Ojjaña jiquiojo onaa acani huohui caje miquiana huasijje, Onesimohua.

¹⁰ Anitaco enijje ejeyo'yo nequi ejjajeanobiaqui-jji equijo. Ohuaya miquianaya huohui'ajja cani jama ba'a: —¿Achajja acuae quiana so'o? —ojaya ebajji.

Macosohua pea'ai huohui'ajja cani: —¿Achajja acuae quiana so'o, de, ecuanajaya ebajji?

Oya Macoso Benabeja jjo'yaseja bacua ejja. Miquiana que poquiyajo, ¡oya jaahuanacue quea pame nee! Jamaya eyaya miquianaya huohuinaje yahuaajo.

¹¹ Jesosa Josoto yani pea'ai. Ohuaya huohui'ajja cani pea'aiya: —¿Achajja acuae nequiana so'o, ecuanajaya ebajji?

Jiquiojo pea beca peejjima Jodio cuana Jesosaja epeeji yani. Ohuaya eya chaco meesahua cani quea pame nee Eyacuiñajjija yajjijo, esejaya Emeshi Mese neija yajjijo. Pea Jodio cuanaja enijje chaco jjima, de.

¹² Epapasi cuanaya yani enijje. Ohuaya pea'ai esohui quea bihui nee huohui cani miquiana que. Yahuaajo oya miquiana nijje ba'ya poa pea'ai. Jesosa Quitoja yajjijo chaco cani ohuaya. Janobajjima nei mimi tiitiani Eyacuiñajji nijje miquianajo jama ba'a: —Eyacuiñajji, ¡miyaya ojjaña Conosajo ba'e cuana Jesosa Quito nijje jjapeequi meesahuacue quea ja'a nee! ¡Miquea esohuijo e'e jojo nei oya cuana jjabahuejjaqui meesahuacue! ¡Miquea esohui jama ba'e tiitii meesahuacue, Eyacuiñajji! —jamaya Epapasi mimiani Eyacuiñajji nijje miquianajo.

13 E'e, Epapasi mimi tiitiiani Eyacuiñajji nijje miquiana jaahuanajji. Quea huesha cuiñajji yasi-jje Jesusaja epeeji cuana Naonisea cuiñajjijo ba'e yasijje, Jienaponi cuiñajjijo ba'e pea'ai yasijje Eyacuiñajji nijje mimi tiitiiani, Epapasi. Jamaya eyaya oya baña.

14 Ecuanaajaya epeeji quea pame nee Noca bajjani yani jiquiojo. Oya eshicuijiquiajji, de. Deja Demasi bajjani yani pea'ai. Ohuaya esohui quea bihui nee huoojea cani miquiana huasijje.

15 ¡Ecuanaajaya esohui quea bihui nee huohuicue Jesusaja epeeji nei cuana huasijje Naoniseajo ba'e yasijje! ¡Epona Nema bajjani oe huohuicue! ¡Ojaya epeeji cuanaya pea'ai huohuicue, joya oja equi yasijje jjachachaquiani Eyacuiñajjija esohui baa!

16 E'e, jiquio ecuea esohui etehue'yo ba neinei majje ¡huohuicue Jesusaja epeeji cuana huasijje Naoniseajo ba'e yasijje! Majoya ohuaya miquianaya quia caje o'oya pea esohui etehue'yo, ma eyaya ebionei tehuenaje o que. ¡Ma esohui shajja'ajjacue, ojjaña miquiaaya!

17 Pea deja Aquipo bajjani huohuicue ecuea esohui jama ba'a: —Eyacuiñajjiya miya huoojea ca'yonaje ojo chacohua. Jamajjeya ¡chacocue quea pame nee ojo! ¡Ojjaña joya eua ohuaya huohui cani jamaya oe acue!

18 Eyaya ca eya jiquio esohui quea bihui nee tehue'yonaje. Deja cuanaja eya pichojea'yo jjima; eya ejeyo'yo tii nequi. ¡A'a eya pajea'yojji! ¡Eyacuiñajjiya miquianaya cajaahuana tiiti cahua quea pame nee!

Mahuiso. Eya Pabo bajjani esohui tehuejji.
Apoa.

Eyacuiñajjija Esohui **New Testament in Ese Ejja (BL:ese:Ese Ejja)**

copyright © 2012 Wycliffe Bible Translators, Inc.

Language: Ese Ejja

Translation by: Wycliffe Bible Translators, Inc.

Ese Ejja [ese], Bolivia

Copyright Information

© 2012, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Ese Ejja

© 2012, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-23

PDF generated using Haiola and XeLaTeX on 18 Apr 2025 from source files
dated 29 Jan 2022

88838088-e20d-51ca-8c91-69194f5ae678